

ETHDIARI

Numerò 53
Dimèrcles 10 de març 1999

HUELHETON

DIARI

D'ARAN

Prètz: 50 pessetes

NÚÑEZ PRESSIONE A VAN GAAL ENTÀ QUE NON SALUDE A CRUYFF EN SÒN AUMENATGE D'AUÉ

ETH BARÇA VÒ ESVITAR QU'ER EXTECNIC ESPLÈITE ERA SUA IMATGE ATH COSTAT DER ACTUAU ENTRENADOR. ETH CLUB TEM QU'ER ACTE SIGUE UN PLEBISCIT CONTRA ETH PRESIDENT.



Er aumenatge a Johan Cruyff que se celebre aué en Camp Nau, contunhe d'èster motiu de polemica. Era directiua deth Barça e er olandés an enforiscat es sòns atacs verbaus enes jornades abantes dera cita e Louis Van Gaal se higece ara guèrra psicològica que mantien andues parts. Er entrenador deth Barça esvitarà quinsevolha referéncia ath sòn compatriòta e non a era intencion

Cruyff non vò parlar, per ara, dera possibla renóncia de Van Gaal a dirigir er equip blugrana: "M'ei igual se i é o non. Van Gaal non a arren a veir tamb eth *dream team*. Me tormente plan mès que Guardiola e Busquets non poguen jogar uns minutes tamb nosati. Eri sòn mès a pròp de jo que d'un aute entrenador", diguec er extecnic. Cruyff a viscut es darrèri dies tamb era sua agenda complèta. Delàger inaugurèc ua placa ena plaça des Campions de Barcelona, ena quau i é imprimida era sua man dreita ath costat de d'alti esportistes illustres com Indurain, Kubala o Pelé.

ETH CONFLICTE PERMANENT

Er aumenatge a Johan Cruyff a carrejat un nau conflicte entre er extecnic deth Barça e eth president deth club, Josep Lluís Núñez. Era luta a passat des jutjats a un nau crotzament d'acusacions mutues. Enes darrèri dies Cruyff e Núñez s'an acusat de mentidèrs en dièrsi còps. Era peleja gessec pr'amor des condicions que Cruyff volie entath sòn aumenatge, çò que non volec era junta directiua, en tot soslinhar çò qu'ère déjà escrit en contracte deth tecnic e en quau s'establien es dus partits d'aumenatge (un en Camp Nau e un aute en Olanda). Cruyff desiraue organisar un triangular (entre eth Barça, eth *dream team* e ua seleccion FIFA), qu'es jogadors dera sua epòca portèssen er escut deth club e auer eth contròtle des entrades. Núñez non volec, mès se trobèc qu'en uns pògui dies se veneren lèu totes es entrades. Cruyff tornèc a acusar a Núñez de mentidèr perque didec qu'er extecnic non auie hèt totes aguestes demanes.

de balhar era man en public a Johan Cruyff. Van Gaal non a ua bona sintonia tamb Cruyff e atierà es desirs deth club, que non vò qu'era fòto publica d'ua salutacion entre andús tecnicos sigue espleitada per Cruyff. Era grana responsa populara qu'a desvelhat er aumenatge a Cruyff preocele ara directiua, qu'a pòur qu'eth partit sigue profitat tamb fins politics e sigue un plebiscit sus era gestion de Josep Lluís Núñez. Era crispacion des darrèrs setmanes a beneficiat ar exentrenador blugrana. Es entrades ja s'an acabat e eth club vò amendir un plan gran protagonisme de Cruyff. Van Gaal, tostemp fidèu as conselhs deth sòn president, a sajat a desseparà-se enes darrèrs setmanes der aumenatge e era directiua li a recomanat qu'esvite publicament eth sòn compatriòta. Eth conselh qu'a rebut ei que salute a Cruyff discretament en vestiari der estadi, luenh des camèras, entà que Johan non treigue profit d'aguest gèst. Dus dies abantes der aumenatge, Van Gaal trobèc ua auta formula entà esvitar quinsevolha referéncia a Cruyff. Tota era plantilha auèc ager jornada de hèsta, exceptadi es jogadors lesionadi: Guardiola, Ronald de Boer, Nadal, Bogarde e Felip. Sergi e Luis Enrique s'incorporèren delàger ara amassada dera seleccion de Camacho entà tornar anet tà Barcelona. Van Gaal s'estauvièc aparéisher deuant des mieis de comunicacion. Eth darrèr dissabte inclús insinuèc qu'eth sòn ajudant, José Mourinho, serà qui amiarà eth Barça contra eth *dream team*. Ager non volec prononcià-se oficiaument, maugrat que semble que se setiarà ena banqueta. Tanpòc non esclarièc se serà ena ròda de premsa posteriora ath partit d'aué. Sonque comunicuèc, Van Gaal, era convocària deth Barça, ena quau inicialment non includie a Busquets, demanat per Cruyff pr'amor que non ei part des plans der actua u entrenador. Mès que sonque uns pògui minutes dempús rectificuèc e *Busi* se tròbe entre es 22 convocadi. Es uniques abséncias son es des lesionadi Guardiola, Ronald de Boer, Nadal e Bogarde. Era plantilha deth Barça tanben s'a encomanat deth clima de tension qu'entore eth partit d'aué. En vestiari deth Camp Nau conviuen dièrses sensibilitats. En tot que jogadors enes vidèos de promocion der aumenatge, d'alti s'an mantingut fidèus a Van Gaal e s'an estimat mès non parlar des merits de Cruyff. Ei eth cas des olandesi, coma Hesp e Kluivert. "Ei un partit normau e voi guanhà-lo. Auem de jogar coma tostemp" diguec eth dauanter. "A d'èster ua hèsta, mès sajaram de guanhà es dus partits" higece eth portèr.



JOHAN CRUYFF: "SE I A SÈTIS UEDI NON I AURÀ PERDON ENTARA JUNTA"

Er nombre d'entrades que demoren ara venda entath partit d'aumenatge a Johan Cruyff ei ua incognita. Aué, er exentrenador blugrana non a pogut èster mès contudent: "Tamb eth gran interès que i a, se deman (per aué) i a sètis uedi non i aurà perdon entad aguesta Junta". Der entorn de Johan Cruyff s'assegure que i a 25.000 entrades que non s'an metut ara venda e que seràn balhades tà penhes fidèus ara Junta Directiua blugrana. Ath delà, era aparicion ager d'un nau paquet de 2.000 entrades qu'eth club metec ara venda enes taquilles, quan se pensauèc que non n'auie, indignèc es representaires der olandés, qu'afirmèc: "Açò desprestige a tot eth mon, as sòcis e as non-sòcis. Non m'ac pogui creir, mès j'ac veiram". En tot qu'eth servici deth servicaisha anonciaue qu'ager ath maitin s'auien venut un totau de 64.000 entrades, e que ja non se veneràn mès localitats a trauèrs des sues terminaus, eth FC Barcelona senhalèc qu'ager ath meddia encara n'i auie 800 tà véner. Deuant es contunhats anoncis qu'asseguren qu'es entrades son acabades e era aparicion de paquets de localitats, coma se siguesse màgia, Cruyff non sabie pas ce qué dèder. "Serà ua suspresa (qu'era gent vage tar estadi). Non sai com ei eth tèma, e non sai pas se i a 1.000 o 15.000 entrades" endonvièc a explicar Cruyff. Er olandés cre qu'eth FC Barcelona met toti es trebucs possibles entà qu'eth Camp Nau non age un plen absolut. A despriet des sues sospieites, Cruyff dauric un margen entara esperança. "Demori enganà-me e que non sigue vertat çò que se ditz, tot e que per açò volia controtrlar jo era venda d'entrades", soslinhèc.

DETIENGUDIS PRESSUMPTI ETARRES EN FRANÇA

Sies persones, entre es quaus i ère eth responsable des comandos illegaus dera banda terrorista ETA, Javier Arizcuren-Ruiz, àlies *Kantauri*, sigueren detingudes ager peth maitin en Paris en dues operacions policiuas. Quate des detencions, era de *Kantauri* entre aguestes, se hèren en un otèl deth districte onzau de Paris, en tot qu'es autes dues se realisèren en un apartament deth districte quinzau. Ad aguesti arrèsti cau ahiger, ager pera tarde, eth dera còsso de HB en municipi guiposcoan d'Arteasu, Dolores Chapartegui Nieves, que semble qu'ei relacionada tamb es etarres detingudi en França. Eth president deth Govèrn espanhòu, José Maria Aznar, qualificuèc coma "plan importantes" aguestes detencions e destaquèc er "exit" dera cooperacion entre França e Espanha.



Kantauri

EGUIBAR LAMENTE QU'ETH GOVÈRN APÒSTE PERA "ESTRATÈGIA POLICIAU"

Eth portavotz deth PNB, Joseba Eguibar, manifestèc ager en Barcelona que, tamb es detencions en França de dièrsi suposadi integrants d'ETA, "nauament demore en evidéncia qu'era estratègia policiua ei era qu'amie era actuacion deth Govèrn espanhòu". Eguibar afirmèc, totun, que tamb aguesti arrèsti eth procès de patz non ei herit, e expressèc era sua confiança en que non siguen vistes com ua "provocacion" per ETA e eth sòn entorn. Eth portavotz deth PNB lamentèc qu'eth Govèrn non apòste pera via deth dialòg politic entà auançar en procès de patz. "Eth PP non ve aguest procès com un procès de patz qu'auance a trauèrs dera conversà e eth dialòg politic entre formacions politiquas".

Parla d'ua grèva en un país petit coma eth nòste non ei pas parlar en vaganaut; tanplan qu'enquia mos còste de hè-mos aradia qu'un collectiu s'amasse tà manifestar era sua disconformitat damb un hèt quinsevolhe. S'era memòria non me falhe, era darrèra mobilisacion, trèt de bèra auta hèta tanben pes estudiants, siguec en favor des pompièrs d'Aran, hè deja quaques annades, quan parlauen d'abolir era sua voluntarietat en favor d'ua professionalisacion impausada. Aquesta mobilisacion des estudiants ei, totun, un ahèr que non cau deishar passar inadvertit perque, encara aué, er enshament en nòste país contunhe d'auer importantes mancanes laguens dera sua evidentata complexitat.

Es estudiants an manifestat era sua justa demana d'un enshament public de qualitat; ben justa, se vedem es importantes subvencions qu'en aguesti moments hornissen er enshament privat en forma de concertacions e que hèn a sospitar qu'ara cuerta es sòns destinadi tad aguest ahèr seràn mès que non pas es adreçats ara publica, un hèt non guaire perceptible en Aran, e qu'òc que provòque seriosi problèms en fòrça barris de granes ciutats, a on era publica demore sonque coma refugi des collectius d'immigrants o classes sociaus de mendre poder adquisitiu.

En Aran eth problèma mès evident ei era precarietat des installacions der Institut que sigueren en sòn moment complementades damb moduls prefabricats e atau continuen. Ei un hèt significatiu aguest -eth des moduls prefabricats-, que demòstre

qu'èm un país a on er enshament non a estat convenientment priorisat e non sonque enes infrastructures, qu'ei un ahèr important, senon tanben en d'auti com era escòla rurau o es escòles mairaus que son assignatures pendentes deth govèrn actuau.

Cèrtament, e ath mèn entèner, es estudiants an eth dret de queishà-se mès tanben l'an es pares que pendent toti aguesti ans an vist era impossibilitat d'accedir a ua escòla mairau publica pera mancaça d'aguestes installacions en país; e tanben l'an aqueri mètres dera escòla rurau que fòrça còps hèn classe en aules que hè decades que non an vist lèu cap de reforma ena sua abitabilitat e contunhen ahumant-se damb eth cauhatge de lenha maumerent; e auem dret de queishà-mos toti es pirenecs que, per qüestions geografiques, èm descriminadi e obligadi a suportar ues despenses de desplaçaments e allotjaments enes ciutats a on son es universitats que non an es auti ciutadans d'aguest país, perque sonque nosati auem aguesti centres tant a desman...


De ben segur qu'en aguest ahèr der enshament i a fòrça gent damb motius de descontent, totun, eth bus der estudiant a estat ua mesura endonviada pera quau cau felicitar eth nòste Conselh e ara Alsina Graells, encara que, com se ve, non sigue sonque un goterèr d'aigua en un mar de problèms.

Francés Boya Alòs

DEMANEN QU'ERA RÒBA JUVENIU SE FABRIQUE EN TALHES MÈS GRANES

ETH PSOE SOLLICITE EN CONGRÈS AS ADMINISTRACIONS QUE RECOMANEN AGUESTA MESURA AS DESSENHADORS ENTÀ LUTAR CONTRA ER AUMENT DERA ANORÈXIA.

Eth Grop Parlamentari socialista ven de presentar ua prepausa non de lei ena quau propòse qu'es administracions publiques recomanen as dessenhadors de mòda e fabricai-



res de ròba qu'aufrissen ara joenesa talhes mès granes dera 38-40.

Er objectiu ei lutar contra era anorèxia. Tanben sollicitèc qu'elabòre era normatiua corresponenta entà que totes es empreses, tant importadores com nacionaus, siguen obligades a

equiparar es talhes europèes e americanes tamb es espanyòles, entà pr'amor que talhes iguales agen es madeishes mesures en toti es comèrci. Segontes eth Grop socialista, era majoritat des tendes de ròba juveniu trabalhen tamb es talhes 36 e 38 e plan pòc tamb era 40. Açò, ena sua opinion, hè que se transmeten uns canons de beresa qu'apòsten entara extrèma magror, çò que pòrte as joenes a emprincipiar dietes entà que se poguen vestir tamb ua talha çò de mès petita possible e enfrontà-se a actituds patologiques ena sua pròpria alimentacion. Atau madeish, eth PSOE demane que s'amien campanhes de sensibilisacion e informacion, entara poblacion en generau, e tara joenesa en particular, sus es riscos que carrega deishar de minjar entà arténher ua extrèma magror. Fin finau, eth PSOE demane que s'articulen es mecanismes de besonh entà favorir qu'es publicistes e es empreses de marqueting siguen receptives ath problèma plantejat pera anorèxia e comencen a enshar imatges que siguen mès d'acòrd tamb era realitat sociau.

Eth nombre de malauts en Espanha a aumentat espectacularment pendent es darrèri ans. En

tot qu'en 1988 i auie quate o cinc malauti annaus, ara ja son mès d'un milèr es naus cassi que se compden cada an, segontes eth doctor Sancho Rof, cap deth Servici d'Endocrinologia der Hospital Ramón y Cajal de Madrid. I a mès chiffres alarmantes. Era Asociación Valenciana de la Lucha Contra la Anorexia y la Bulimia (Avalcab) a senhalat que, enes païsi desvolopadi, era anorèxia nerviosa afècte, apruprètz, ua de cada 200 joenes d'entre 12 e 24 ans. Sonque en Estats Units aguesta malautia la patissen mès de dus milions de persones, segontes era Asociación Americana de Bulimia e Anorèxia. Es especialistes preven qu'era chifra d'afectats contunharà creishent. Ath delà, ja non son sonque es joenes es que patissen aguesta malautia. Maugrat qu'encara son eth collectiu mès afectat -eth 90% des cassi se da en gojates de 14 a 18 ans-, es expèrts en endocrinologia an observat un preocupant augment deth numerò de malauti òmes. Es hemnes

madures e es mainatges de mens de 12 ans son un aute segment dera poblacion que comence a somà-se ara lista de victimas d'aguesta afeccion.

Era preocupacion entad aguesta malautia a arribat enquia un punt en quau s'a decretat judiciument er ingrès ospitalari de diuerses malautes tamb eth consentiment des pairs, que non tròben ua auta solucion entà esvitar qu'acaben tamb era sua vida. Eth jutjat de Barcelona encargat d'incapacitacions e internaments decrete cada mes ua mieja de 16 ospitalisacions pera fòrça per cassi d'anorèxia e bulimia, en equiparar legaument aguesti trastorns alimentaris tamb ua malautia mentau. Non pas toti es cassi tractadi an es madeishi resultats: eth 40% des pacients venç era malautia; ath torn d'un 57% non arrenh ua curacion totau e entre un 1 e un 3% des malauti morissen per desnutricion, arturada cardiaca o suicidi.